

दिनांक 24.09.2025
 समय: 18.45 बजे
 आकाशवाणी जयपुर-अजमेर
 प्रादेशिक समाचार

- प्रधानमंत्री नरेंद्र मोदी रो काल बांसवाड़ा जिला रा नापला मांय 2800 मेगावाट बूता री माही बांसवाड़ा परमाणु विद्युत परियोजना रा काम री नींव रखण रो कार्यक्रम।
- राष्ट्रपति द्रौपदी मुर्मू आज नई दिल्ली मांय 64वीं राष्ट्रीय कला प्रदर्शनी रा पुरस्कार दीना-राजस्थान रा दो कलाकार ई शामिल।
- केन्द्रीय मंत्रिमंडल रेल कर्मचारियां ने 78 दिन रा उत्पादकता आधारित बोनस देवण री मंजूरी दीनी।
- एशिया कप क्रिकेट टूर्नामेंट रा तैत आज दुबई मांय भारत रो मुकाबलो बांग्लादेश ऊँ-

प्रधानमंत्री नरेंद्र मोदी रो काल बांसवाड़ा कने नापला मांय 2 हजार 800 मेगावाट बूता री माही बांसवाड़ा परमाणु विद्युत परियोजना रा काम री नींव रखण रो कार्यक्रम है। माही बंधा कने बणबा वाळी आ परियोजना परमाणु ऊर्जा मिशन रा तैत तैयार करी जावेला। ई परियोजना माथे करीब 42 हजार करोड़ रुपया रो खर्च आवेला। प्रधानमंत्री मोदी जनता ने 1 लाख 8 हजार करोड़ रुपया रा खर्च वाळा विकास रा न्यारा-न्यारा कामां री सौगात ई देवेला। आं मांय राज्य सरकार रा 30 हजार करोड़ रुपया रा खर्च वाळा विकास रा 48 काम ई शामिल है। श्री मोदी इण ई कार्यक्रम रे दौरान बीकानेर-दिल्ली कैंट अर जोधपुर-दिल्ली कैंट बीच चलायी जावण वाळी वंदे भारत एक्सप्रेस अर उदयपुर-चंडीगढ़ एक्सप्रेस रेलगाडी ने हरी झंडी बता र रवाना करेला। प्रधानमंत्री ई मौके जनसभा ने ई संबोधित करेला। इण ई सिलसिला मांय जोधपुर मांय राख्या जावण वाळा जळसा मांय रेल मंत्री अश्विनी वैष्णव अर संस्कृति अर पर्यटन मंत्री गजेन्द्र सिंह शेखावत मौजूद रेहवेला, जद के बीकानेर मांय राख्या जावण वाळा कार्यक्रम मांय केन्द्रीय कानून मंत्री अर्जुन राम मेघवाल मौजूद रहवेला। ई बीच प्रधानमंत्री रा कार्यक्रम सारू बांसवाड़ा मांय मोटा पैमाना माथे तैयारियां करी जा रही है। कार्यक्रम री तैयारियां रो जायजो लेवण सारू मुख्यमंत्री भजन लाल शर्मा आज दोपहर बांसवाड़ा पूर्या। श्री शर्मा नापला मांय माही बांसवाड़ा राजस्थान परमाणु बिजलीघर री नींव रखण री ठौड़ अर सभा री ठौड़ रो दौरा कर र ज़रूरी व्यवस्थावां अर तैयारियां रो जायजो लीनो अर अहलकारां ने ज़रूरी हुकम दीना।

नामी विचारक पंडित दीनदयाल उपाध्याय री 109 वीं जयंती ने काल स्वच्छता दिवस रा तौर ऊँ मनायी जावेला। ई मौके राज्य मांय केई कार्यक्रम राख्या जावेला। ई मौके जयपुर कने धानक्या रेलवे स्टेशन माथे पंडित दीनदयाल राष्ट्रीय स्मारक स्थल परां खास कार्यक्रम राख्यो जावेला। ई दौरान सार्वजनिक ठौड़ां श्रमदान ई कर्यो जावेला।

राष्ट्रपति द्रौपदी मुर्मू आज नई दिल्ली मांय 64वीं राष्ट्रीय कला प्रदर्शनी रा पुरस्कार दीना। ललित कला अकादमी री ओर ऊँ राखी ज्या जळसा मांय राज्य रा ई डॉ. गिरिराज शर्मा ने मूर्तिकला अर डॉ. कनुप्रिया ने मिक्स्ड मीडिया रा हलका मांय बेहतरीन काम सारू नवाजी ज्या। ई मौके राष्ट्रपति कह्यो के कला सांस्कृतिक विरासत ने मजबूत बणावण अर समाज ने और संवेदनशील बणावण रो मजबूत जरियो है। वे ललित कला अकादमी ऊँ ई साल कलाकारां कानी ऊँ बणायी ज्यी कलाकृतियां री बिक्री ने बधावो देवण माथे खुशी जतायी। वे कह्यो के इण ऊँ कलाकारां ने माली मदद मिलेला अर देश री रचनात्मक माली व्यवस्था मजबूत करेला।

मुख्यमंत्री भजनलाल शर्मा जनता ऊँ जीएसटी री रेट मांय कमी रो बत्ता ऊँ बत्तो फायदो लेता थकां देशी सामान री खरीदी ने बधावो देवण री अपील कीनी है। मुख्यमंत्री जनता रे नाम संदेश मांय कह्यो के जीएसटी सुधार ऊँ रोजीना री जरूरत रा सामान रा मोल मांय कमी आयी है। वे "जीएसटी बचत उत्सव" रे दौरान कारोबारियां अर दुकानदारां ऊँ कीमत मांय कमी रो फायदो ग्राहकां ताई पूगावण री अपील कीनी। श्री शर्मा नौरता अर त्योंहारी सीजन मांय "वोकल फॉर लोकल" अभियान ने मजबूत करण सारू देशी सामान काम लेवण री अपील कीनी।

ई बीचे जीएसटी बचत उत्सव रा तैत राज्य मांय लोगां ने भांत-भांत रा कार्यक्रम, बैठकां अर संगोष्ठियां राख र कर सुधार रा फायदां री जाणकारी दी जा रही है।

जोधपुर रा मणाई गांव री सरकारी स्कूल मांय आज केन्द्रीय संचार ब्यूरो की ओर ऊँ स्वच्छता ही सेवा अर जीएसटी बचत उत्सव रा बारां मांय खास जागरूकता कार्यक्रम राखी ज्यो। कार्यक्रम मांय लोगां ने साफ-सफाई रा महत्व री जाणकारी दीरीजी अर व्यक्तिगत अर सामाजिक सुरक्षा रा फायदा रा बारा मांय बतायी ज्यो। ई रे अलावा हाल ही मांय करी ज्या जीएसटी सुधारां री जाणकारी ई दीरीजी।

केंद्रीय मंत्रिमंडल री आज नई दिल्ली मांय व्ही मीटिंग मांय केई खास फैसला करी ज्या। सूचना अर प्रसारण मंत्री अश्विनी वैष्णव खबरनवीसां ने आं फैसलां री जाणकारी देता थकां बतायो के मीटिंग मांय रेल्वे, हाईवे, जहाज बणावण अर विकास री न्यारी-न्यारी परियोजनां ने मंजूरी दीरीजी।

श्री वैष्णव बतायो के मंत्रिमंडल रेलवे रा 10 लाख 91 हजार कर्मचारियां ने 78 दिन रा उत्पादकता आधारित बोनस रा तौर ऊँ एक हजार 865 करोड़ रुपया ऊँ बत्ता चुकारां री मंजूरी दे दीनी। कर्मचारियां ने बोनस री रकम दुर्गा पूजा अर दशहरा ऊँ पैली दी जावेला। मंत्रिमंडल भारत रा जहाज बणावण अर समुद्री पारिस्थितिकी तंत्र ने ओजू बेहतर बणावण सारू 69 हजार 725 करोड़ रुपया रा पैकेज ने ई मंजूरी दे दीनी।

प्रदेश मांय चलाया जा रह्या शहरी अर ग्रामीण सेवा अभियान रा तैत न्यारी-न्यारी ठौड़ां शिविर लगा र जनता ताई सरकारी योजनावां रो फायदो पूगायो जा रह्यो है अर मौके ई परेशानियां दूर करी जा रही है। ई सागे ई न्यारी-न्यारी ठौड़ां स्वास्थ्य नारी सशक्त परिवार अभियान रा तैत शिविर लगाया

जा रहया है, ज्यां मांय मोटी तादाद मांय लोग पूग रहया है। न्यारा—न्यारा ज़िलां मांय प्रभारी मंत्री अर अहलकार जा र आं शिविरां रो जायजो ले रहया है। उपमुख्यमंत्री दिया कुमारी आज अजमेर ज़िला रा किशनगढ़ मांय लगायी ज्या शहरी सेवा शिविर रो दौरा कीनो। ई मौके वे सरकारी योजनावां रो फायदो लेवण वाळा पात्र लोगां ने मकाना रा पट्टा दीना अर प्रधानमंत्री आवास योजना रा तैत चैक दीना।

उपमुख्यमंत्री 6 महीना री उम्र रा बच्चां रो अन्न प्राशन संस्कार ई करवायो। ई मौके वे कह्यो के सरकार कानी चलायी जा रही जनता रा भला री योजनावां रो फायदो लोगां ने मिल रहयो है।

राजस्थान लोक सेवा आयोग रा नुवा बणायी ज्यां सदस्य सुशील कुमार बिस्सू अर डॉ. अशोक कुमार कलवार आज काम—काज संभाळ लीनो। दोन्यू सदस्य आयोग रा अध्यक्ष अर सदस्यां सागे मुलाकात कीनी। राज्यपाल हरिभाऊ बागडे री मंजूरी पाछे राज्य सरकार आर.पी.एस.सी. मांय काल तीन नुवा सदस्यां री नियुक्ति कीनी ही। आं मांय पैली वाळा आई.पी.एस. अहलकार हेमंत प्रियदर्शी, डॉ. सुशील कुमार बिस्सू अर डॉ. अशोक कुमार कलवार शामिल है। सुशील कुमार बिस्सू नामी शिक्षाविद् अर पर्यावरण संरक्षक है। हेमंत प्रियदर्शी साल 1992 बैच रा आईपीएस अहलकार रहया, जद के डॉ. अशोक कुमार कलवार ब्लड कैंसर रा देश रा मान्योड़ा डॉक्टर है।

भ्रष्टाचार निरोधक ब्यूरो आज भीलवाड़ा अर जयपुर मांय दो न्यारा—न्यारा मामलां मांय घूस लेता थकां तीन आरोपितां ने रंग्या हाथां पकड़ लीना। ब्यूरो री भीलवाड़ा टीम समग्र शिक्षा परियोजना रा ए.ई.एन राजकुमार मून्दड़ा अर जेईएन भारत भूषण गोयल ने 50 हजार रुपया री घूस लेता थकां पकड़ लीना। आरोपितां माथे स्कूल बणावण रा कामां रा बिल पास करण री एवज मांय घूस री आ रकम लेवण रो आरोप है। ए.सी.बी. री जयपुर टीम कानोता पुलिस थाणा रा ए.एस.आई. बन्ने सिंह ने 30 हजार रुपया री घूस लेता थकां रंग्या हाथां पकड़ लीनो। दोन्यू मामलां मांय आरोपितां ऊँ पूछताछ करी जा रही है।

अलवर कने थानागाजी मांय आज एक तेज़ रफ्तार ऊँ जा रहया डम्पर री फेंट मांय आ जावण ऊँ मोटरसाइकिल सवार चार जणां री मौत व्हे गयी। पुलिस रे मुजब मेजोड गांव रा रहवासी सगळा लोग एक ही पिरवार रा हा। हादसा पाछे रीस्योड़ा लोग अलवर—जयपुर गेलो जाम कर दीनो। एक और हादसा मांय बारां ज़िला रा आमली गांव कने नेशनल हाईवे नम्बर 90 माथे दो कारां री टक्कर रे कारण एक पुलिस वाळा री मौत व्हे गयी। अटरू रो रहवासी पुलिस कर्मचारी ड्यूटी सारू बारां जा रहयो हो।

एशिया कप क्रिकेट टूर्नामेंट रा तैत आज संयुक्त अरब अमीरात रा दुबई मांय भारत रो मुकाबलो बंगलादेश ऊँ व्हेला। ओ टी-20 मुकाबलो रात आठ बज्यां सुरू व्हेला। दोन्यू टीमां सुपर फोर दौर रो पहलो मैच जीत चुकी है। भारत ई टूर्नामेंट मांय पाकिस्तान ने दूजी दफा शिकस्त दीनी जद के बंगलादेश श्रीलंका ने मात दीनी।
